

## RUGBYA



Lekuona zalandza da gaur Nimesen aurka jokatzeko. KOLDO ALDUNTZIN

## Miarritzek ez luke arazorik izan behar Nimes gainditzeko

KOLDO ALDUNTZIN / DONOSTIA

Nimes eta Rumilly izango dira euskal taldeen aurkariak Frantziako Ligako hirugarren jardunaldian. Miarritzek Nimes hartuko du gaur arratsaldeko 6.00etan Aguilera. Talde ona izan arren, ez dugu uste Mediterraneoek ustekaberik eman dezaketarik. Lehen *poule*-an Baionak Rumillyra joko du bigarren garaipenaren bila.

Ligako hirugarren *poule*-an, bi neurketa aurreratu dira gaurko egunera, aipaturiko Miarritze-Nimes, eta Grauhlet-Lourdes. Gainera, lehen partidua, ohizkoa ez den orduan jokatu da, duela bi aste bezala. Izan ere, Munduko Zesta Txapelketako finala jokatu da gaur 22.30etatik aurrera, eta Miarritzekoek ez dituzte bi ikuskizunak nahastu nahi.

Talde biek jokaturiko bi partiduetatik bana galdu eta irabazi dute. Bigarren jardunaldian, lapurtarrek norgehiagoka ona egin arren, hiru puntuz galdu zuten Agenen. Nimes, aldiz, erraz nagusitu zen Grauhlet-en aurka

etxean 44-3. Argi dago, Grauhlet-ek aurtan ere estu eta larri ibili beharra duela mailari eusteko, horregatik, ez da oso erreferentzia baliagarria garaipen hau. Liga aurreko Du Manoir Kopa dugu argibiderik zuzena eta zalandzarik gabe askosaz ere bide hobe egin dute lapurtarrek hiru neurketa irabaziz. Nimesek, berriz, jokaturiko hirurak galdu ditu.

Nimestarrak izan ziren bestalde, duela bi denboraldi Miarritze kanporatu zutenak Kopatik. Harrekerotik ez dituzte indarrak neurtu. Iazko denboraldian talde biak hamasei onenen artean sartzea lortu bazuten ere, azken kanporaketetik at geratu ziren.

Neurketa honi begira, Robert Bernos eta Alain Marot Miarritzeko entrenatzaile berriek, ez dute aldaketarik iragarri joan den eguneko partiduekiko. Agian, Audap-en orde, Boule sartuko da eta zalandza izango dira Lekuona eta Noiane.

Beste neurketa ikusgarri bat, Perpignan-Castres izango da 16.15etan. Frantziako FR2 telebistak zuzenean emango du.

## Munduko txapeldunak Euskal Herritik gertu-gertu jokatu du urrian

K. A. / DONOSTIA

Australiak Daxen eta Bordelen jokatu du Akitania eta Frantziaren aurka urriaren 16 eta 30ean, Frantziara egingo duen bisitaldian barne. Wallabiesek beste bi neurketa ere jokatzeko asmoa dute Agenen urriaren 20an Hego-Ekialdeko selek-

zioaren aurka eta Parisen, Frantziaren aurka, azaroaren 6an bigarren test *match*-a.

Horretaz gain, Frantziak Errumania hartuko du Briven urriaren 17an 16.15etan (FR3 telebistak eskainiko du) eta Ingalaterra-Zeelanda Berria azaroaren 27an (FR2k zuzenean emanango du).

## ARRAUNKETA

## Zortzi untzi ariko dira lehian gaur eta bihar El Corte Ingles Ikurrinan


San Pedro, Donibaneko, eta Orio berriro aurrez aurre Nerbioin

**D**enboraldiko azken Ikurrinaren aurreneko jardunaldia jokatu da gaur arratsaldeko 13.00etatik aurrera Nerbioi ibaian. Pasai San Pedroko Libia, Donibaneko Arraunlariak taldeko La Navarra, eta Orioko San Nikolas izango dira berriz ere lehian. Beste alde batetik, kale zozketa bakarria egingo da Ikurrin honetan, kaleen arteko diferentziak duen eragina ebitatzeko asmoz.

RAMON BASALDUA / BILBO

Pasai San Pedroko untziak ez du parekorik izan amaitzeaz dagoen denboraldi honetan. Julian Osaren mutilak nagusi izan dira itsaso zabalean jokatu diren estropadetan eta erreketan jokatu direnetan ere bai. Horra hor, orain dela astebate eskas Bilbao Bizkaia Kutzaren Ikurrin egin zuen erakustaldia. Nolanahi ere, estropada bakoitza desberdina da eta Donibaneko Arraunlariak eta Oriok Libiari irabazteko beste aukera bat izango dute gaur Nerbioi erreka ur zikinetan, arratsaldeko ordu batean hasiko den estropadan.

Orio San Pedrori Zarauzko Ikurrin eta Espainiako Txapelketan gailendu zitzaion. Donibaneko Arraunlariak taldea, ordea, ez da San Pedrori irabazteko gai izan denboraldi honetan aurrez aurre izan diren estropada guztietan. Nolanahi ere, Pedro



Orio denboraldia ongi amaitzen saiatuko da.

RAMON BASALDUA

Mari Maziziorrek entrenatzen duen tripulazioak iaz El Corte Ingles Ikurrinaren hemezortzigarren edizioa irabazi zuen, estropada eremuko errekor berria jarritz gainera.

### LIBIA FAVORITO BAKARRA

Esandako guztia kontuan izanik, sekulako ezustea izango litzateke El Corte Ingles Ikurrina San Pedrok ez irabaztea, Osaren mutilek argi eta garbi utzi baitute eurak aurtan indartsuenak. Beste alde batetik, ikusi egin beharko da zer-nolako eragina duen korranteak estropada honetan. Hasiara batean ez luke alde handiegirik egon behar kaleen artean, marea gora ordu biak hamar gutxiagotan izango da eta.

Nolanahi ere, eta kaleen arteko diferentziak izan dezakeen era-

gina ebitatzeko asmoz, kale banaketa berezia ezarri dute antolatzaileek. Aurreneko jardunaldian baino ez da kale zozketa egingo, bigarrenaren traineru bakoitzak aurretik ezarritako kale batetik ariko baita. Gaurko estropadan aurreneko kaletik doazen untziak hirugarrenetik abiatuko dira bihar eta alderantziz. Gauza bera gertatzen da bigarren eta laugarren kaleetatik ariko diren untziekin.

Azkenik, Ondarroa, Santurtzi, Kaiku eta Zierbena ariko dira nor baino nor Bizkaiko traineruen Sariaren hamazazpigarren edizioan. Azken estropadetan Santurtzi nagusi izan bada ere, ez da ahaztu behar Kaiku dela Bizkaiko txapelduna eta Zierbena Kontxarako sailkatu zen Bizkaiko untzi bakarria.

## 1 FORMULA

## Alain Prostek denboraldia amaitzean 1 Formula uzteko erabakia hartu du

DONOSTIA

Alain Prost gidari frantziarrak 1 Formula utzi egingo du denboraldi hau amaitzean, atzo Estorileko zirkuituan ziurtatu zuenez. Williams-Renaulteko liderraren hitzetan, oso gogorra izan da erabakia hartzea. «Erabaki hau hartzea zaila izan da niretzat. Nahia-nahia nukeen hau titulua irabazi ondoren aditza eman, baina azkenaldian sortutako zurrumurru guztiei eta horrek sortzen duen gehiegizko presioari amaiera emateko beharra nuen. Denboraldi honen amaieran utziko dut 1 Formula».

Denboraldi osoan pentsatuta-

ko erabakia dela aipatu zuen Prostek, ez momentu batean hartutakoa. «Denboraldia hasi zenetik buruan nuen hori. Kanpoko arrazoi askok izan dute eragina hemen, denak Williams-Renaultetik kanpokoak. Adibidez, Superlizenzia emateko atzerapena eta Monaco eta Alemanian jasotako zigorrak besteak beste. Uste dut egunen batean erretiratu beharra nuela, eta hau da egiteko momenturik egokiena».

Prostek bere laugarren titulua eskura dezake bihar Portugalgo Sari Nagusian. 1 Formularen duen presioa eta arriskua baztertu egin nahi ditu Prostek. «Uste dut kirol honi asko eman diodala, kirol ho-

nek niri asko eman didan bezala». Williams-Renault etxeko partaide guztiei ere denboraldian zehar eginiko lana eskertu nahi izan zien. «Zoragarria izan da benetan Williams-Renaulteko guztiekin lan egitea».

Frank Williams taldeko jabeak, bere aldetik, Alain Prostek eginiko denboraldia aipatu zuen eta momentuz datorren denboraldirako taldean izango diren gidarien izena ez duela azalduko aurreratu zuen.

Atzo eginiko lehen entrenamenduetan izandako emaitzei dagokienez, Estorileko zirkuituko errekorra ondu zuen Alain Prostek.